

Bizkaiko hiririk zaharrenean dena prest dago gaur Ibilaldia 2000 ospatzeko

Balmasedako ikastolak zuzenbidea eta euskara uztartu dituztenak omenduko ditu

Gorane Agirre / Balmaseda

Zortzi mende bete ditu Balmasedak, eta dena prest dauka 80.000 laguni baino gehiagori abegi egiteko. Ibilaldia 2000 jaia ospatzeko antolatzaileek detailerik txikiena ere gertu badute ere, atzo zeruari so ziren, eguraldia lagun izango duten esperantzaz.

BALMASEDAKO Zubi Zahar ikastolak 28 urte luze daromatza euskararen aldeko zubiak altxatzen. Gaur Ibilaldia 2000n Mendez mende zubiak eraikitzen segitzeko bere konpromisoa berretsiko du.

Aurtengo Ibilaldiak zuzenbidea eta euskara uztartu dituzten 13 profesionali egingo die gorazarre, gaur goizeko 11:30etan izango den ekitaldian. Aurreko urteetan, euskara eta kirola edo euskara eta unibertsitatea uztartu dituztenak omendu izan ditu Ibilaldiak.

Edonola ere, 2000. urteko Ibilaldia goizeko 09:30etan hasiko da. Zubi Zahar ikastolako —Enkartazioetan bakarra da— eraikinaren aurrean moztuko dute zinta. Ekitaldi horretan, besteak beste, Juan Jose Ibarretxe lehendakaria, Inaxio Oliveri Hezkuntza sailburua, Josu Bergara diputatu nagusia eta EH, EAJ eta EAKo ordezkariak izango dira.

Ibilbidean zazpi jaigune

Zinta moztetan emango zaio hasiera antolatzaileek gaurko prestatu duten ekitaldiz beteriko egitarau oparoari. Era berean, ibilbidea zabalduko du. Zazpi kilometro luze da, eta zazpi jaigune daude bertan, etorriko diren guztien gozagarri.

Balmasedako Zubi Zahar ikastola 14 ikaslerekin eta andereño bakar batekin hasi zen. Egun, 28 urte geroago, 222 ikasle ditu haur eta lehenengo hezkuntzan. Gaurko jaian jasoko duten dirua Zubi Zahar ikastolaren egoitza zaharberritzera bideratuko dute, eraikinak 115 urtebete baititu.

Edonola ere, Ibilaldiak badu beste helburu garrantzitsu bat ere: hain justu, Enkartazioak eskualde erdal-



INIGO AZKONA

Ibilaldiaren antolatzaileak, atzo, azken prestaketa lanak egiten.

dunean euskararen erabilera sustatzea.

Zubi Zahar ikastolak Bilboko Abusuko ikastolari eman- go dio 2001. urteko Ibilaldia antolatzeko lekukoa. Abusukoek duela sei urte ere antolatu zuten Ibilaldia.

Autoa hobe etxean

Antolatzaileek 5.000 autorentzako aparkalekuak atondu badituzte ere, ibilgailua etxean uzteko deialdia egin zuten atzo.

Renfe eta Bikaibus konpainiek 400 pezetako txartel bakarra ateratu dute. Txartelaren erabiltzaileak Bilbo edo Ibar Ezkerretik Muskizera horduko dira trenetaz, eta handik sei minututik behin autobusak aterako dira jaiguneraino.

Gozatzeko aukera ugari

BALMASEDARA etortzen diren euskaltzaleek gozatzeko aukera ugari izango dituzte. Batetik, askorentzat Balmaseda eta bere ingurua ezagutzeko parada izango da. Ezezagun samarra bada ere, Bizkaiko hiririk zaharrena da. Bestetik, zazpi kilometroko ibilbidean eta zazpi jaiguneetan, goizetik hasi eta iluntzera arte hainbat ekitaldi izango da etenik gabe.

Haurrek beren gunea izango dute: *Zoko maitea*. Bertan, pailazoak, magia ekitaldiak eta jolasleku ugari izango dituzte.

Pandozales delako gu- nean, bertsolariak, trikitilariak eta gaiteroak izango dira. *Portillo* gunetan, berriz, herri kirolak, marrazkilariak, ipuin kontalariak eta hankapaluak egongo dira.

Heavy soinuek ere beren txokoa izango dute Ibilaldian. Horrela, *Tramein*- sa-n izango dira The Trasten Traste, Asgarth, Idi Bihotz, Urtz, Sekula San- tan eta PiLT.

Frontoi aldean ere kontzertuak izango dira: hain zuzen, Split 77, Bittor Aiepe eta Zea Myas taldeen emanaldiak.

Donostiako Udala Igeldoko lurak «hipotekatzen» eta «herri izaera arriskuan jartzen» ari dela salatu du Herri Kontseiluak

Hirigintza plan berriarekin %750 etxebizitza gehiago izango direla dio

Erredakzioa / Donostia

UDALAK aurreko legegintaldian Igeldon etxebizitzak egiteko Plan Partziala onartu zuen, baina legegintzaldi honetan aldaketa batzuk egin ditu. Herrigunean 212 etxebizitza eraikiko dituzte —aurreko planean aurreikusi baino 110 gehiago; egun dauden 28 etxebizitzekin alderatuta, %750 gehiago—, eta babes ofizialeko etxebizitzak Donostia osoko biztanleei eskainiko dizkie Udalak.

Udala Igeldoko lur erabilgarri osoa «hipotekatzen» ari dela salatu zuen herenegun Herri Kontseiluak —planak lur erabilgarri osoa hartzen du bere baitan—, eta igeldotarrek beste nonbaiten bizi beharko dutela. Dioenez, «herri izaera arrisku bizi- zian» jartzen ari da, eta ez du betetzen Eusko Jaurlaritzaren Lurralde Antolamendurako araudia.

Plan Partzialak 74 etxe egitea aurreikusten zuen, eta horietatik 48 babes ofizialekoak izatea. Babes ofizialeko 18 etxe kooperatibari agindu zizkion. Planaren bigarren fasean, berriz, beste 110 etxebizitzetatik babes ofizialekoak 72 izatea aurreikusten da —horietatik 16 kooperati- barentzat—.

Herri Kontseiluak plan berriaren aurkako 422 sinadura bildu ditu, eta ezadostasuna adierazten jarraituko duela esan zuen.

EUSKO JAURLARITZA

GOBIERNO VASCO

HEZKUNTZA, UNIBERTSITATE
ETA IKERKETA SAILA
Arabako Lurralde Ordezkaritza

DEPARTAMENTO DE EDUCACION,
UNIVERSIDADES E INVESTIGACION
Delegación Territorial de Álava

ESKOLA - GRADUATUA EKAINEKO DEIALDIA

Eskola - graduatu Titulua lortzeko probak **ekaineko** deialdian egingo dituztenei jakinarazten diegu eskaeren zerrenda eta proba egiteko tokia jende aurrean jarrita daudela Arabako Hezkuntza Ordezkaritzako Informazio atalean (San Prudentzio, 18).

Ea berean, proba hau **ekainaren 10ean** egingo dela gogorarazten dizuegu.

EUSKO JAURLARITZA

GOBIERNO VASCO

INDUSTRIA, MERKATARITZA
ETA TURISMO SAILA

DEPARTAMENTO DE INDUSTRIA,
COMERCIO Y TURISMO

OHARRA

Eusko Jaurlaritzako Industria, Merkataritza eta Turismo Sailak zera jakin erazi nahi du: datorren maiatzaren 29tik aurrera, hau da, datorren astelehenetik aurrera, Bizkaiko Industria Ordezkaritzak Bilboko Maximo Agirre, 18-bis kalean dituan bulegoak General Concha 23 kalean kokatuko direla. Era berean, telefono eta fax zenbaki berriak ere izango dituzte:

- Telefonoa: 94-403.14.00
- Faxe: 94-403.14.45